

15 Nov. 2025

पैहले खास-खास खबरां

- प्रधानमंत्री नरेन्द्र मोदी होरें मुंबई-अहमदाबाद हाई-स्पीड रेल कॉरिडोर परियोजना दे कम्मै च हासल प्रगति ते गुजरात दे सूरत च ज़ेरे तामीर बुलेट ट्रेन स्टेशन दे कम्मै दा जायजा लैता।
- समूलचा राष्ट्र अज्ज म्हान सुतैंतरता सेनानी ते जनजाती नेता भगवान बिरसा मुंडा हुं'दी जयंती पर जनजातीय गौरव दिवस मना करदा ऐ।
- नौगाम पुलस थाने च चानचक्क होए दे धमाके च 9 लोक मारे गे न ते 32 जने जख्मीं होए न।
- भारत ते पराग्वे ने दपक्खी, इलाकाई, बहुपक्खी ते वैश्विक स्तरें पर सांझे जतनें दे राहें आतंकवाद दा मुकाबला करने दी अपनी वचनबद्धता जताई ऐ।
- ते ढाका च एशियाई तीरंदाजी प्रतियोगिता च भारत दिआं अंकिता भक्त ते धीरज बोम्मादेवरा व्यक्तिगत रिकर्व मुकाबले च खिताब जित्ने आहले पैहले भारती खड्डारी बनी गे न।

<><><><><><>

PM Gujarat

प्रधानमंत्री नरेन्द्र मोदी होरें अज्ज गुजरात दे जनजाती आबादी आहले नर्मदा ज़िले दे डेडियापाड़ा कस्बे च 9 ज़हार 700 करोड़ रुपें शा मते दी लागत आहली विकास परियोजनाएं दा उद्घाटन कीता ते नींह पत्थर बी रक्खे। एह परियोजनां बुनियादी ढांचे, सेहत, शिक्षा ते विरासत पर केंद्रित न। इंदे च जनजातियें दे सशक्तिकरण पर चेचा ज़ोर दित्ता गेदा ऐ। एह परियोजनां जनजाती गौरव दिवस दे मौके उप्पर, म्हान जनजाती नेता ते स्वतंत्रता सेनानी भगवान बिरसा मुंडा हुं'दी दी 150मीं जयंती दे उपलक्ष्य च शुरू कीतीआं गेइयां न। प्रधानमंत्री मोदी होरें जनजातीय महापुरुष बिरसा मुंडा हुं'दी जयंती दे मौके पर आयोजित सभा गी संबोधित करदे होई आखेआ जे जनजाती गौरव ज़हारे बरें थमां भारत दी चेतना दा अननुदृष्ट हिस्सा रेहा ऐ। उ'नें इस गल्लै पर ज़ोर दित्ता जे जिसलै बी देश दे सम्मान, स्वाभिमान ते स्वशासन दा सोआल उठेआ ऐ, भारत दा जनजाती समाज सबनें शा अगगे खडोते दा रेहा ऐ। श्री मोदी होरें आखेआ जे देश दे स्वतंत्रता आंदोलन च जनजाती समाज दे जोगदान गी कदें भुलाया नेई जाई सकदा। उ'नें इब्बी आखेआ जे अज्ज श्री गोविंद गुरु पीठ जनजाती भाशा संवर्धन केंद्र दी बी स्थापना कीती गेई ऐ जित्थे सबनें जनजातियें दी बोलियें पर शोध कीता जाह्ग। प्रधानमंत्री होरें आखेआ जे उ'दे कन्नै जुडी दिए कहानियें ते गीतें गी बी इस केंद्र च संरक्षित कीता जाह्ग। एहदे शा पैहले, श्री मोदी होरें मुंबई-अहमदाबाद हाई-स्पीड रेल कॉरिडोर दी प्रगति दी समीक्षा करने लेई गुजरात दे सूरत च ज़ेरे तामीर बुलेट ट्रेन स्टेशन दा दौरा कीता। प्रधानमंत्री बड्डलै सूरत ब्हाई अड्डे पर उतरे ते अंत्रोली इलाके च पुज्जे, जित्थे इक बुलेट ट्रेन स्टेशन दा निर्माण कम्म चला करदा ऐ। श्री मोदी

होरें अधिकारियें कन्नै गल्लबात कीती ते कम्मै दा जायजा लैता। भारत दी सबनें शा महत्वाकांक्षी बुनियादी ढांचा परियोजनाएं चा इक, मुंबई-अहमदाबाद हाई-स्पीड रेल कॉरिडोर तकरीबन 508 किलोमीटर तगर फैले दा ऐ। एह्दे च गुजरात ते दादरा सने नगर हवेली च 352 किलोमीटर ते महाराष्ट्र च 156 किलोमीटर दा इलाका शामिल ऐ। एहू कॉरिडोर साबरमती, अहमदाबाद, आणंद, वडोदरा, भरूच, सूरत, बिलिमोरा, वापी, बोईसर, विरार, ठाणे ते मुंबई सने प्रमुख शैलें गी जोड़ग। सबूरा होने पर, बुलेट ट्रेन मुंबई ते अहमदाबाद बश्कार जातरा दे समें गी तकरीबन द'उं घैंटे तगर घट्ट करी देग। इस परियोजना कन्नै पूरे कॉरिडोर पर बपार, सैलसफा ते आर्थिक गतिविधियें गी बढ़ावा मिलने ते इलाकाई विकास गी रफ्तार मिलने दी मेद ऐ। तकरीबन 47 किलोमीटर लम्मी सूरत-बिलिमोरा सैक्शन, निर्माण दे अखीरले चरण च ऐ। सूरत स्टेशन दा डिज़ाइन शैहरा दे विश्व प्रसिद्ध हीरा उद्योग थमां प्रेरित ऐ, जेहड़ा खूबसूरती ते कम्मकाजी समर्थ, दौनें गी गै दर्शादा ऐ। श्री मोदी होरें सागबारा तालुका दे देवमोगरा ग्रांउ च जनजाती समुदास दी कुल देवी पंडोरी माता हुं'दे मंदरै च पूजा-अर्चना बी कीती।

<><><><><><><><>

Nadda Amrit 10 years

किफायती दवाइएँ ते इलाज-मुआलजे लेई भरोसेमंद प्रत्यारोपण पैहल - अमृत नै अज्ज 10 बरें पूरे करी लैते न। नमीं दिल्ली च अमृत दी 10मीं बरेंगंड आहले समारोह च सेहत मंत्री जगत प्रकाश नड्डा होरें आखेआ जे इस कार्यक्रम ने पिच्छले 10एँ बरें च मरीजें गी तकरीबन 8 ज़्हार 500 करोड़ रपे बचाने च मदाद कीती ऐ। उ'नें दस्सेआ जे बक्ख-बक्ख राज्यें ते केंद्र शासित प्रदेशें च 255 अमृत फार्मसी न, जेहिडियां दवाइएँ, प्रत्यारोपणें, सर्जिकल डिस्पोजेबल्स ते होरनें सामग्रियें सने 6 ज़्हार 500 शा मते उत्पादें पर बद्धोबद्ध खुदरा मुल्ल पर 50 फीसद तगर दी छूट दिंदिआं न। श्री नड्डा होरें पूरे देशें च 10 नमीं अमृत फार्मसी दा उद्घाटन कीता। उ'नें अमृत नेटवर्क दा विस्तार 500 फार्मसी तगर करने दी परिकल्पना दा बी जिक्र कीता जेहदा मकसद मरीजें लेई जरूरी दवाइएँ ते चिकित्सा आपूर्ति दी किफायती पुज्ज च सुधार करना ऐ। उ'नें आखेआ जे देशें दे हर इक मेडिकल काॅलेज ते हर इक जिला अस्पताल च अमृत फार्मसी पक्क गै स्थापत कीती जानी लोड़चदी ऐ।

<><><><><><><><>

Janjatiya Gourav Diwas

समूलचा राष्ट्र अज्ज म्हान स्वतंत्रता सेनानी ते आदिवासी नेता भगवान बिरसा मुंडा हुं'दी जयंती दे उपलक्ष्य च जनजाती गौरव दिवस मना करदा ऐ। केंद्र सरकार ने जनजातीय इतिहास गी जींदा रक्खने दे महत्व गी ध्यान च रक्खदे होई 15 नवंबर गी जनजाती गौरव दिवस दे रूप च मनाने दा फैसला कीते दा ऐ। समें दे कन्नै एहू उत्सव जनजाती गौरव सप्ताह दे रूप च विस्तारित होई गेआ ऐ, जिसी बक्ख-बक्ख मंत्रालयें ते राज्यें च सांस्कृतिक कार्यक्रमें, प्रदर्शनियें ते शैक्षिक गतिविधियें दे कन्नै

मनाया जंदा ऐ जेहड़े जनजाती नायकें दी विरासत गी जीवंत करदे ना। तोआई प्रधानमंत्री नरेंद्र मोदी ते गृह मंत्री अमित शाह होरें अज्ज स्वतंत्रता सेनानी ते आदिवासी नायक भगवान बिरसा मुंडा होरें' गी उं'दी 150मीं जयंती पर श्रद्धांजलि अर्पित कीती। सोशल मीडिया पोस्ट च, श्री मोदी होरें आखेआ ऐ जे जनजाती गौरव दिवस दे इस मौके उपपर समूलचा देश मातृभूमि दे गौरव दी राखी च बिरसा मुंडा हुं'दे बेजोड़ जोगदान गी पूरी श्रद्धा कन्नै याद करदा ऐ। गृह मंत्री अमित शाह होरें आखेआ ऐ जे बिरसा मुंडा हुं'दा जीवन हर इक देशभक्त लेई प्रेरणा दा स्रोत ऐ।

<><><><><><>

Home Ministry Nowgam

नौगाम पुलस थाने च कल रातीं चानचक्क होए दे धमाके च 9 लोकें दी मौत होई गई। नमीं दिल्ली च अज्ज संवाददाताएं गी संबोधित करदे होई गृह मंत्रालय च जम्मू कश्मीर संभाग दे मामलें सरबन्धी संयुक्त सचिव प्रशांत लोखंडे होरें दस्सेआ जे इस घटना व 27 पुलसकर्मी, 2 राजस्व अधिकारी ते त्रै आम बसनीक जखमीं होए ना। उं'नें दस्सेआ जे जखिमएं दा अस्पताल च इलाज चला करदा ऐ ते सरकार इस दुखै दी घड़ी च मरोने आहलें दे परोआरें कन्नै खड़ोती दी ऐ। श्री लोखंडे होरें दस्सेआ जे एह धमाका उसलै होआ जिसलै इक आतंकी नेटवर्क दी तफ्तीश दे दरान जवत कीते गेदे विस्फोटक पदार्थें ते रसैनें दी जांच कीती जा करदी ही। उं'नें दस्सेआ जे विस्फोटकें गी पुलस थाना परिसर दे खुल्ले इलाके च सुरक्षित रखेआ गेदा हा ते मानक प्रक्रिया दे तैहत फोरेंसिक जांच दा कम्म कीता जा करदा हा। उं'नें दस्सेआ जे पुलस थाने ते आले-दोआले दिएं किश इमारतें गी बड़ा भारी नुकसान पुज्जा ऐ।

<><><><><><>

DGP/Jt. Secy- PC

तोंआई जम्मू-कश्मीर दे पुलस महानिदेशक नलिन प्रभात होरें बी इस हादसे बारे मीडिया गी अज्ज तफसील पेश कीती। उं'नें दस्सेआ जे मारे गेदे लोकें च प्रदेश जांच एजेंसी SIA दा इक कर्मी- फोरेंसिक साईंस लैबोर्ट्री टीम दे त्रै कर्मी- 2 क्राइम सीन फोटोग्राफर- मैहकमा माल दे दंड अधिकारी- जेहड़े इस जांच च मैजिस्ट्रेट टीम दा हिस्सा हे ते टीम च शामिल इक दर्जी दी बी इस हादसे च जान चली गई ऐ। घायलें च 27 पुलसकर्मी- मैहकमा माले दे 2 अधिकारी ते कन्नै लगदे इलाके दे त्रै बसनीक शामिल ना।

<><><><><><>

LG /CM Grief

उपराज्यपाल मनोज सिन्हा ते मुख्मन्त्री उमर अब्दुल्ला होरें नौगाम पुलस थाने अंदर होए दे धमाके पर गैहरा दुख प्रगट कीता ऐ। एल.जी होरें इक सनेह च मारे गेदे लोकें दे परोआरें कन्नै हमदर्दी प्रगट करदे होई घायलें दे तौले नरोए होने दी कामना कीती ऐ। एल.जी होरें दुर्घटनावश होए दे इस हादसे दे पिच्छे दे कारणें दा पता लाने लेई जांच दा बी हुकम जारी कीता ऐ। मगरा उपराज्यपाल होरें इस हादसे च अपनी जान मुहाने आहलें पुलसकर्मीयें – मैहकमा माल दे अधिकारियें ते इक आम नागरिके दे शवें पर पुष्प चक्र चाढ़दे होई उनेंगी श्रद्धांजलि भेंट कीती। तोंआई मुख्मन्त्री उमर अब्दुल्ला होरें

इस घटना पर गैहरी दुख बुझदे होई- इस हादसे च जान मुआहने आहलें दे परोआरें- मित्रें- -रिश्तेदारें कन्नै दुख ते हमदर्दी प्रगट कीती ऐ।

<><><><><><>

LoP Terrorism

जम्मू-कश्मीर विधानसभा च विपक्ष दे नेता सुनील शर्मा होरें आखेया ऐ जे श्रीनगर दे नौगाम पुलस थाने च होए दा धमाका- असेंगी आतंकवाद दा मकाबला करदे होई सुरक्षाबलें दे सामने लगातार बनी दियें चुनौतियें दा बी चेता नोआंदा ऐ। उनें जम्मू-कश्मीर दे लोकें दी सुरक्षा ते इत्थै रमानदारी ब्हाल करने दे केन्द्र सरकार दे धेइए गी फही पक्का कीता ते आखेया जे सरकार आतंकवाद गी दना बर्दाश्त नैई करने दी अपनी नीति पर म्हेशा कायम रौहग ते इंदा पूरी तगडेयाई कन्नै मुकाबला कीता जाहगा। उनें आखेया जे पूरे खित्ते च सुरक्षत म्हौल जकीनी बनाने लेई आतंकवाद रोधी कारवाइयें-खूफिया एजेंसियें बश्कार तालमेल ते सुरक्षा ढांचे च होर बेहतरी आंदी जाहगा।

<><><><><><>

NIA Delhi Blast

राष्ट्री जांच एजेंसी – एन.आई.ए ने पच्छिम बंगाल दे उत्तरी दिनाजपुर जिले दे इस्लामपुर ग्रांउ थमां नूर आलम नांउ दे इक व्यक्ति गी दिल्ली च लाल किले दे नेडे होए दे बम्ब धमाके दे सरबंध्यै च हिरासत च लैता ऐ। नूर आलम उत्तरी दिनाजपुर जिले दा बसनीक दस्सेआ जा'रदा ऐ ते ओहू फरीदाबाद स्थित अल फलाह युनिवर्सिटी दा विद्यार्थी ऐ। पुलसै मूजब, ओहू इक ब्याह आहले समारोह च शामिल होने लेई इस ग्रांउ च आए दा हा जिसलै उसगी हिरासत च लेई लैता गेआ।

<><><><><><>

Bihar BJP

बिहार च भारती जनता पार्टी दे अध्यक्ष दिलीप जायसवाल होरें आखेआ ऐ जे असैम्बली चुनाएं च एन.डी.ए दी शानदार जित्त दे बाद पार्टी दा केंद्री नेतृत्व तौले गै सरकार बनाने कन्नै सरबंध्यत सबनें पैह्लुएं गी मुक्कदा रूप देई देगा। उ'नें आखेआ जे अगले द'उं दिनें च सब किश तय होई जाहगा। उनें दस्सेआ जे पार्टी मतदाताएं दा आभार व्यक्त करने आस्तै राज्य दे सबनें जिलें च कल धन्नवाद मार्च कडुगा। सरकार गठन दी प्रक्रिया दे बारे च श्री जायसवाल होरें आखेआ जे सबनें शा पैहले एन.डी.ए दे सब्बै भ्याल दल अपने विधायकें दिएं बैठकें च अपने नेताएं गी चुनडन। ओहदे परैन्त गठबंधन दी इक सांझी बैठक च एन.डी.ए दे नेता दा चुनांउ कीता जाहगा। उ'नें आखेआ जे एहदे'नै सरबंध्यत कार्यक्रम ते ब्यौरा, पार्टी दा केंद्री नेतृत्व घोशत करगा।

<><><><><><>

Bihar – RK Singh

भारती जनता पार्टी ने साबका केंद्री मंत्री ते पार्टी दे वरिष्ठ नेता आर.के. सिंह होरें'गी पार्टी बरोधी गतिविधियें च शामिल होने दे आरोप च 6एं ब'रें लेई पार्टी थमां मुअत्तल करी दित्ता ऐ। पार्टी नै उ' नेंगी कारण दस्सो नोटिस बी जारी कीता ऐ। आर.के. सिंह पिच्छले किश दिनें थमां पार्टी नेतृत्व दे

फैसलें पर अपना ऐतराज़ जता करदे हे ते एन.डी.ए दे खलाफ बी बोला करदे हे। तोआई पार्टी ने अपने द'उं होरनें औहद्धेदारें खलाफ बी कार्रवाई कीती ऐ। कटिहार थमां विधान परिषद दे सदस्य अशोक अग्रवाल ते उं'दी घरै आहली ते कटिहार दी मेयर उषा अग्रवाल होरें'गी बी मुअत्तल करी दित्ता गेआ ऐ। अशोक अग्रवाल हुं'दे पुत्तर सौरव अग्रवाल होरें कटिहार विधानसभा हलके थमां बी.जे.पी दे अधिकारिक मेदवार तारकिशोर प्रसाद खलाफ चुनांऽ लड़ेआ हा। उ'नेंगी बरोधी महागठबंधन च शामिल विकासशील इंसान पार्टी ने अपना मेदवार घोशत कीता हा।

<><><><><><>

India Paraguay

भारत ते पराग्वे ने दपक्खी, इलाकाई, बहुपक्खी ते वैश्विक स्तरें पर सांझे जतनें दे राहें आतंकवाद दा मुकाबला करने दी अपनी वचनबद्धता जताई ऐ। असुनसियन च आयोजित सांझे आयोग तंत्र दी पैहली बैठक दे दरान, दौने पक्ख इस गल्लै पर राजी होए न जे आतंकवाद अपने सबनें रूपें ते अभिव्यक्तियें च अंतर्राष्ट्री शांति ते सुरक्षा लेई गंभीर खतरा ऐ। दौनें पक्खें दपक्खी लाहू लेई सुरक्षा ते साइबर सुरक्षा दे खेत्तरें च सैह्योग ते दपक्खी तालमेल आहले तंत्र गी मजबूत करने दी इच्छेआ बी जताई ऐ। बैठक दी अध्यक्षता पराग्वे दे उप बदेश मंत्री, राजदूत विक्टर वर्दुन ते बदेश मंत्रालय दे साबका सचिव, पेरियासामी कुमारन होरें कीती। दौनें देशें दपक्खी सरबंधें दी मजूदा स्थिति दी व्यापक समीक्षा कीती। दौनें पक्ख इक-दुए दे सैह्योग कन्नै लाहकारी खेत्तरें च आपसी सहायोग गी होर बधाने, बपार गी बढ़ावा देने, निवेश गी प्रोत्साहित करने ते दपक्खी हितें आहले खेत्तरें च बहुआयामी सांझ-भ्याली गी मजबूत करने दे कन्नो-कन्नो दपक्खी समझौतें पर गल्लबात गी अगगे बधाने दे महत्वै पर राजी होए ना।

<><><><><><>

Defence Garud

भारती वायु सेना कल्लै थमां फ्रांस च दपक्खी ब्हाई अभ्यास- गरूड-25 दे 8में संस्करण च शमूलियत करग। ओह 27 नवंबर तगर फ्रेंच एयर एंड स्पेस फोर्स दे कन्नै एहू अभ्यास करग। रक्षा मंत्रालय ने आखेआ ऐ जे इस अभ्यास दा मकसद असल परिचालन वातावरण च रणनीति ते प्रक्रियाएं च सुधार करना ऐ। मंत्रालय ने दस्सेआ ऐ जे एहू अभ्यास दौनें वायु सेनाएं बश्कार पेशेवर विचार-विमर्श, परिचालन जानकारी दा आदान-प्रदान ते कम्मकाज आहली बेहतरीन प्रणालियें गी सांझा कीते जाने दा इक मौका बी प्रदान करग। इस अभ्यास दे दरान फ्रांस दे मल्टीरोल जंगी ज्हाजें दे कन्नै भारती वायु सेना दा एस.यू- 30 एम.के.आई ज्हाज बी अपने जंगी कौशल दा प्रदर्शन करग। इस अभ्यास च ब्हाउ थमां ब्हाउ च जंग, वायु रक्षा ते सांझे हमले आहले अभियानें पर ध्यान केन्द्रित कीता जाहगा।

<><><><><><>

Jaishankar

बदेश मंत्री सुब्रह्मण्यम जयशंकर होरें अमरीका च भारती महावाणिज्य दूतें दे इक सम्मेलन दी अध्यक्षता कीती जेहदे च मुख्य भरै दे मिशनें दे वरिष्ठ भारती राजनयिकें गी भारत-अमरीका दपक्खी

सैह्योग ते प्रवासी भारतीयें दे कन्नै जुडाव दी समीक्षा लेई सहेआ गेआ। कल न्यूयॉर्क च आयोजित इस बैठक च वाशिंगटन डी.सी. स्थित भारती दूतावास ते न्यूयॉर्क, सैन फ्रांसिस्को, शिकागो, अटलांटा, ह्यूस्टन, बोस्टन, लॉस एंजिल्स ते सिएटल च स्थित वाणिज्य दूतावासें दे वरिष्ठ राजनयिक शामिल होए। डॉ जयशंकर होरें भारत ते अमरीका दी सांझ-भ्याली गी मजबूत करने लेई भारती राजदूती दफ्तरें ते कारोबारी सफारतखानें दी वचनबद्धता ते जतनें दी सराहना कीती।

<><><><><><>

ICOM

अजैबघरें सरबन्धी अंतर्राष्ट्री काउंसल - आई.सी.ओ.एम. दा 27मां आम सम्मेलन दुबई च सम्पन्न होआ। पच्छम एशिया च पैहली बारी आयोजित इस सम्मेलन च अजैबघरें दे डरैक्टरें, सांस्कृतिक नीति निर्माताएं, शिक्षाविदें ते विरासत सरबन्धी माहिरे-विशेषज्ञें सने साड्डे चार जहार शा मते प्रतिभागियें हिस्सा लैता। सम्मेलन दे अखीरले ध्याडे, सांस्कृतिक कूटनीति पर बारै इक इजलास लोआया गेआ जेह्दे च दुबई संस्कृति ते कला प्राधिकरण दी अध्यक्ष शेखा लतीफा बिनत मोहम्मद बिन राशिद अल मक्तूम ते राज्य मंत्री नूरा बिनत मोहम्मद अल काबी होरें हिस्सा लैता। लतीफा होरें संयुक्त अरब अमीरात दी सांझी सांस्कृतिक जडें बारै गल्ल कीती, जिसलै के अल काबी होरें यूनेस्को, आई.सी.सी.आर.ओ.एम. ते इलाकाई संस्थानें दे कन्नै सांझ-भ्याली दे राहें सांस्कृतिक कूटनीति दे बवहारिक प्रभाऽ पर बल दित्ता। अंतर्राष्ट्री सैह्योग राज्य मंत्री ते एक्सपो सिटी दुबई प्राधिकरण दिएं सीईओ रीम बिन इब्राहिम अल हाशिमी होरें अजैबघरें गी संवाद ते सैहभागिता लेई महत्वपूर्ण थाहर करार दित्ता ते सांस्कृतिक संस्थानें च युवाएं गी शामिल करने दे महत्व पर लोऽ पाई। यू.ए.ई. दे राष्ट्रपति हुं'दे सांस्कृतिक सलाहकार ते यूएई युनिवर्सिटी दे चांसलर ज़की अनवर नुसेबेह होरें आखेआ जे अजैबघर, जींदी जागदिआं संस्थां न, जेहिडयां यादें गी संरक्षित करदिआं न ते नमिएं काहडें गी बढावा बी दिदिआं न।

<><><><><><>

Archery

भारत दी अंकिता भक्त ते धीरज बोम्मादेवरा एशियाई तीरंदाजी चैंपियनशिप च व्यक्तिगत रिकर्व मुकाबलें च खिताब जित्तेने आहले पैहले भारती खड्गारी बनी गे न। ढाका च अंकिता ने ओलंपिक्स च चांदी दा तगमा जित्तेने आहले नाम सु-ह्योन गी 7-3 कन्नै हराइयै एह उपलब्धि हासल कीती। एह्दे परैन्त धीरज ने फाइनल च राहुल गी 6-2 कन्नै हराइयै सुन्ने दा तगमा जित्तेआ। चैंपियनशिप च भारत ने हुनै तगर दा सबनें शा बेहतरीन प्रदर्शन कीता ऐ।

<><><><><><>

Shooting

भारती निशानेबाज ईशा सिंह होरें काहिरा च विश्व निशानेबाजी चैंपियनशिप च महिलाएं दे 25 मीटर पिस्टल मुकाबले च कैंहू दा तगमा जित्तिyै, अपना पैहला व्यक्तिगत विश्व चैंपियनशिप तगमा हासल कीता ऐ। ईशा दे तगमे कन्नै भारत ने टूर्नामेंट च 10 ओलंपिक मुकाबलें च ऐतिहासिक प्रदर्शन

करदे होई सुन्ने दा 1, चांदी दे 4 ते कैहू दे 2 तगमे हासल कीते। भारत कुल मलाइयै सुन्ने दे 3, चांदी दे 5 ते कैहू दे 4 तगमें कन्नै त्रीये नम्बरै पर ऐ जिसलै के चीन सुन्ने दे 10 तगमें कन्नै पैहली थाहरै पर ते कोरिया सुन्ने दे 6 तगमें कन्नै दुई थाहरा पर ऐ।

<><><><><><>

Mid Night Marathon

तंदरूस्ती ते सामुदायिक भागीदारी गी बढावा देने दी इक्क बड्डी कोशश दे तैहत्त जम्मू-कश्मीर खेढ काउंसल आसेआ अज्ज 15 नवम्बर गी जम्मू दे मौलाना आजाद स्टेडियम च जम्मू मिड-नाईट मैराथन दे त्रीये संस्करण दा आयोजन कीता जा रदा ऐ। आकाशवाणी जम्मू दे संवाददाता दी रिपोर्ट मुजब इस कार्यक्रम च सबनें स्तरें लेई बक्ख-बक्ख श्रेणिएं च द्रौड़ें दा आयोजन कीता जाहग। एहू मैराथन एम.ए स्टेडियम थमां शुरू होग ते शैहरें दिएं मुक्ख थाहरें चा होइयै लंगघग।

<><><><><><>